

Las Squadras

1

Informaziuns generalas e messadi tier la radunanza communal dils 15 da zercladur 2023

Messadi per la radunanza communal dils 15-06-2023

Messadi per la radunanza communal dils 15-06-2023 allas 20.00 uras a Cumpadials

La suprastonza communal suttametta a Vus las suandontas fatschentas:

1. Avertura e beinvegni
2. Elecziun da 2 dumbravuschs
3. Protocol dalla davosa radunanza communal dils 15-12-2022
4. Rendaquen 2022
5. Rapport dils revisurs ed approbaziun dil quen annual 2022
6. Tractazion ed approbaziun dil project da lavineras per igl uaul da Puzzastg e concessiun dil credit brut da 650'000 francs
7. Orientaziuns
8. Varia

Tractanda 3: Protocol

Il protocol dalla radunanza communal dils 15-12-2022 ei staus exponius public e disponibels sin la pagina d'internet naven dils 30-12-2022 duront 30 dis. Il protocol sa era vegnir abonnaus.

Tractanda 4: Rendaquen 2022

Il rapport da gestiun e quen 2022 ch'ei vegnius repartius a mintga casada dat sclariment en detagl sur dil quen communal 2022. Plinavon cuntegn el las ulteriuras informaziuns usitadas.

Ord quei motiv vegn quella tractanda buca presentada specialmein en LAS SQUADRAS.

A caschun dalla radunanza communal vegnan il canzlist communal ed il president communal plinavon a dar sclariment detagliau sur dil quen communal 2022.

Tractanda 5: Rapport dils revisurs ed approbaziun dil quen annual 2022

La cumissiun da quen e gestiun sut il presidi da *Michele Damiano* ha controllau ed examinai il quen communal. Sin fundament d'art. 49 dalla constituziun communal succeda la controla aritmetica dil quen communal entrais in biro fiduziar. Quell'incumbensa ei vegnida exequida dil biro fiduziar ADDISSA SA da Glion. *Ladina Capeder* e *Roman Holderegger* dil biro ADDISSA SA han fatg la revisiun dil quen e dalla contabilitat en collaboraziun culla cumissiun da quen e gestiun.

Ils raports detagliai dalla cumissiun da quen e gestiun sco era quel dil biro fiduziar ein d'anflar el rapport da gestiun e quen 2022.


Proposta

Sin fundament dil resultat dalla revisiun propona la cumissiun da quen e gestiun alla radunanza communal:

- d'approbar il quen communal 2022 sco presentau a scret,
- da dar scarica alla suprastonza, als ulteriurs organs responsabels ed all'administraziun e d'admetter in cordial engraziament per lur engaschi en favur da nossa vischernaunca.

Tractanda 6: Tractazion ed approbaziun dil project da lavineras per igl uaul da Puzzastg e concessiun dil credit brut da 650'000 francs

Naven digl onn 1995 eis ei vegniu construiu en igl uaul da Puzzastg lavineras. Ei setracta per part da lavineras permanentas e per part da lavineras temporaras sco era d'auters objects per la segirtad. Igl uaul da Puzzastg vala sco in uaul da schurmetg da gronda impurtonza per il vitg da Surrein cun ils quartiers Giachentrina, Reits e la via Val naven dalla Punt Gonda entochen Mir Alv.



Cun prender differentas mesiras tecnicas e cun construir curtins per evitar donns dalla selvaschina eis ei vegniu empraua da purtar anavos igl uaul ad ina natira cun schurmetg natural. Tochen igl onn 2003 han las mesiras pridas purtau in pign

success. Iis donns d'animals selvadis han lu denton priu tier considerablamein. Entras quels gronds donns en cumbinaziun cun malsognas (donns da bau scorsa eav.) ha igl uaul buca pli pudiu serevegnir. Iis donns dil bau han effectuau ch'igl ei stau necessari da pinar lenna e cheutras ha ei dau grondas largias en igl uaul da schurmetg. Entras squetsch da bovas e squetsch da lavinas ein plinavon ils indrezs da segirtad vegni donnegiai.



La situaziun actuala pretenda perquei ussa mesiras. Il present project digl uffeci d'uaul e prighels dalla natira dil Grischun vul refar las construcziuns da schurmetg ch'ein avon maun e per part era construir novs indrezs da schurmetg. Ei setracta en emprema lingia da metter en uorden ils objects ch'ein avon maun en il territori ch'ei periclitau il pli fetg, pia Puzzastg miez. Era en il territori da Crest Vaulas e dil Pégn dil nummer vegn fatg lavurs da manteniment. Entras quellas lavurs vegn emprau da sanar ils objects ch'ein gia avon maun e leu nua ch'ei fa basegns construiu novs rempars e reits da segirtad encunter erosions. Cun quellas sanaziuns duei vegnir impiediu ch'ei rumpa ora lavinas pintgas e grondas sco era vegnir evitau bovas en quei territori.

Cuosts

Tenor calcul vegn quintau cun cuosts totals da 650'000 francs. Quels cuosts semettan ensemble sco suonda:

- rumir material ord las ladineras	frs. 45'000.--
- sanar il sochels da betun	frs. 62'500.--
- pinar ladineras donnegiadas	frs. 15'000.--
- midar ora ladineras e tocca rutta	frs. 10'000.--
- remplazzar ladineras temporaras	frs. 150'000.--
- remplazzar ladineras permanentas	frs. 225'000.--
- segirar las construcziuns da reits encunter erosions	frs. 20'000.--
- demontar pilasters a Portas	frs. 5'000.--
- rempar da crappa a Sulagval	frs. 5'000.--
- lavurs nunprevedidas	frs. 53'500.--
- direcziun dallas lavurs	frs. 59'000.--
cuosts totals	frs. 650'000.--

Cantun e Confederaziun surprenden 74 % dils cuosts che munta la summa da 481'000 francs. Aschia restan per la vischnaunca cuosts da totalmein 169'000 francs.

Las lavurs vegnan exequidas duront ils proxims 2 onns. Ig

onn 2023 eis ei previu da far lavurs per la summa da 250'000 francs per quei project.



Proposta

La suprastanza communal propona alla radunanza communal d'aprobar il project da ladineras per igl uaul da Puzzastg e da conceder il credit brut da 650'000 francs.

Informaziuns cuortas

Niev survigilader dalla deponia ad Igniu

Dapi igl onn 2019 survigileschan Kurt Felber e Giusep Deplazes la deponia ad Igniu. Cun la fin digl onn 2022 ha Giusep Deplazes terminau quei engaschi. Plinavon ha Kurt Felber reduciu igl engaschi per la deponia. La suprastanza communal engrazia a Giusep Deplazes sco era a Kurt Felber per il zun schazegiau survetsch ch'els han prestau per la vischnaunca. Sco niev survigilader dalla deponia ei dapi entginas jamnas Roland Bachmann da Rabius en funcziun. Nus engraziein ad el per sia promtadad da s'engaschar per nossa communitad. Las uras d'avvertura dalla deponia ein sco suonda:

- mardis e gievgia: 17.00 - 20.00 uras
- sonda: 09.00 - 12.00 uras

First responders

Il Cantun Grischun ha decidiu d'engaschar gruppas d'emprem agid localas en las regiuns en las qualas in emprem agid professional sa muort la situaziun geografica buca adina arrivar spert uonda el liug d'urgenza. Las persunas che fan part a questas gruppa d'emprem agid senumnan «first responders». Era en vischnaunca da Sumvitg stattan da niev cun *Rebecca Cajac*, *Simona Cathomas*, *Hugo Deflorin*, *Sereina Livers*, *Severin Schaniel*, *Silvana Monn* ed *Ursin Monn* siat persunas a disposiziun sco «first responders». Iis «first responders» vegnan equipai cun il material necessari e scolai per ils engaschis d'emprem agid. La suprastanza communal engrazia als «first responders» per lur engaschi en favur dalla populaziun.

En cass d'urgenza sto vegnir telefonau alla numera 144.

Editura

Vischnaunca Sumvitg, Via Quadras Su 10, 7175 Sumvitg
telefon: 081 920 25 00, fax: 081 920 25 08,
e-mail: info@sumvitg.ch